



Na osnovu člana 15. Stav (1) tačka 2. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“ br. 49/06 i 51/09), člana 69. Statuta Općine Centar Sarajevo – prečišćen tekst („Službene novine Kantona Sarajevo“, broj: 23/04) i Odluke o izvršavanju Budžeta Općine Centar Sarajevo za 2023. („Službene novine Kantona Sarajevo“, broj: 2/23) Općinski načelnik d o n o s i :

P R A V I L N I K

o uslovima i načinu dodjele finansijskih sredstava namijenjenih razvoju i unaprjeđenju inovatorskog istraživanja na području Općine Centar Sarajevo za 2023. godinu

I DIO- OPŠTE ODREDBE

Član 1. (Predmet)

Ovim Pravilnikom se detaljnije uređuju uslovi i postupak za izbor korisnika finansijskih sredstava planiranih u Budžetu Općine Centar Sarajevo za 2023. godinu, namijenjenih razvoju i unaprjeđenju inovatorskog istraživanja.

Član 2. (Namjena korištenja sredstava)

Finansijska sredstva, u skladu sa ovim Pravilnikom, mogu biti korištena namjenski za:

- a)** Konsenzualni patent
- b)** Potpuno istraživanje patenta
- c)** Razvoj inovacija, projekata i učešće na domaćim/međunarodnim takmičenjima i smotrama iz oblasti inovacija

Član 3. (Iznos sredstava)

- (1) Finansijska sredstva će biti dodijeljena u skladu sa raspoloživim budžetskim sredstvima Općine Centar Sarajevo za 2023. godinu, i to u maksimalnom iznosu do 400,00 KM za konsenzualni patent, maksimalnom iznosu do 2.000,00 KM za potpuno istraživanje patenta i sufinansiranje 50% troškova za učešće na domaćim/međunarodnim takmičenjima i smotrama iz oblasti inovacija u maksimalnom iznosu do 1.000,00 KM. Komisija za izbor korisnika finansijskih sredstava namijenjenih razvoju i unaprjeđenju inovatorskog istraživanja (u daljem tekstu: Komisija) će, uz

saglasnost Općinskog načelnika, a uzimajući u obzir broj prijava i raspoloživa finansijska sredstva, te u skladu sa članom 5. ovog Pravilnika, odrediti konačan iznos podrške po prijavi.

- (2) Općinski načelnik, na prijedlog Komisije, ima pravo da izmijeni omjer raspodjele sredstava iz opravdanih razloga (manje ili više prijava na pojedinačni LOT)
- (3) Korisnik je dužan dodijeljena sredstva koristiti namjenski, a prema zahtjevima navedenim u prijavi na Javni poziv (*Obrazac I- Prijavni obrazac*).

II DIO- PRAVO UČEŠĆA I KRITERIJI

Član 4. (Postupak za ostvarivanje prava)

- (1) Aplikant ima pravo da aplicira samo na jedan od tri ponuđena LOT-a, te u skladu sa formalno pravnim uvjetima Javnog poziva, ostvariti pravo na finansijsku podršku po jednom osnovu
- (2) Aplikanti sa pravom učešća: Fizička lica (Inovatori), obrazovne ustanove i organizacione jedinice (savezi i udruženja inovatora i/ili nevladine organizacije i/ili registrirane naučnoistraživačke organizacije i/ili inovacioni centri), sa područja Općine Centar Sarajevo, koji u svom programu obuhvataju razvoj projekata i unaprjeđenje inovatorskog istraživanja
- (3) Javni poziv za dodjelu finansijskih sredstava namijenjenih razvoju i unaprjeđenju inovatorskog istraživanja na području Općine Centar Sarajevo za 2023. godinu, Općinski načelnik objavljuje u sredstvima javnog informisanja i na web stranici Općine Centar Sarajevo.

Pravilnik uređuje i definiše 3 (tri) LOT-a, i to kako slijedi:

- a) **LOT 1: Finansijska podrška za konsenzualni patent u iznosu do 400,00 KM**
 - b) **LOT 2: Finansijska podrška za potpuno istraživanje patenta u iznosu do 2.000,00 KM**
 - c) **LOT 3: Finansijska podrška za razvoj inovacija, projekata i učešće na domaćim/međunarodnim takmičenjima i smotrama iz oblasti inovacija do 1.000,00 KM**
- (4) Javni poziv za dodjelu finansijskih sredstava namijenjenih razvoju i unaprjeđenju inovatorskog istraživanja na području Općine Centar Sarajevo za 2023. godinu sadrži slijedeća poglavlja:
- a) Predmet javnog poziva
 - b) Cilj poziva i namjena sredstava
 - c) Pravo učešća
 - d) Kriterije za ocjenu prijave i izbor korisnika
 - e) Sadržaj potrebne dokumentacije
 - f) Link za preuzimanje Prijavnog obrasca
 - g) Način i rok podnošenja prijave
 - h) Ostale odredbe

Uz popunjen Prijavni obrazac po Javnom pozivu, obavezno je priložiti:

- a) Potvrdu Instituta za intelektualno vlasništvo gdje je vidljivo da je proteklo zakonskih 18 mjeseci od datuma podnošenja prijave, odnosno datuma priznatog prvenstva (LOT 1 i LOT 2)

- b)** Potvrdu Instituta za intelektualno vlasništvo da je inovacija/ patent koji se predlaže za dodjelu sredstava, prihvaćen ili dokaz da je zahtjev za prihvatanje inovacije/patenta predat Institutu za intelektualno vlasništvo (LOT 3)
- c)** Izjava o namjenskom utrošku sredstava (LOT 1, LOT 2 i LOT 3)
- d)** Potvrda o otvorenom i aktivnom računu kod banke (Originalni dokument, na stariji od mjesec dana) (LOT 1, LOT 2 i LOT 3)

(5) Javni poziv ostaje otvoren do utroška sredstava od dana objavljivanja u sredstvima javnog informisanja, a najkasnije do 30.11.2023. godine.

Član 5.

(Kriteriji za izbor korisnika bespovratnih sredstava)

(1) Postupak dodjele finansijskih sredstava namijenjenih razvoju i unaprjeđenju inovatorskog istraživanja na području Općine Centar Sarajevo za 2023. godinu, provodi Komisija primjenom sljedećih kriterija i mjerila:

(2) **Opšti kriteriji:**

- Da aplikant ima prebivalište na području Općine Centar Sarajevo;
- Da aplikant ima otvoren i aktivan račun u banci.

(3) **Posebni kriteriji za aplikante koji apliciraju na LOT 1 i LOT 2:**

- Da je aplikant već aplicirao za zaštitu patenta u Institutu za intelektualno vlasništvo Bosne i Hercegovine i za koje je prošlo 18 mjeseci od datuma predaje za zaštitu (pravo prvenstva)

(4) **Posebni kriteriji za aplikante koji apliciraju na LOT 3:**

- Da će aplikant dostaviti Potvrdu obrazovne ustanove i/ili organizacione jedinice (savezi i udruženja inovatora i/ili nevladine organizacije i/ili registrirane naučno- istraživačke organizacije i/ili inovacioni centri) da se projekat realizira iz oblasti inovacija i/ili pozivno pismo od organizatora takmičenja/smotre

III- IMENOVANJE KOMISIJE I POSTUPAK EVALUACIJE PRIJAVA

Član 6.

(Imenovanje i rad Komisije za izbor korisnika finansijskih sredstava namijenjenih razvoju i unaprjeđenju poslovanja samostalnih privrednika)

- (1) Komisiju imenuje Općinski načelnik.
- (2) Komisija se sastoji od najmanje dva člana iz reda državnih službenika i jednog vanjskog člana iz realnog sektora iz oblasti inovacija.
- (3) Komisija radi u punom sastavu i za svoj rad je odgovorna Općinskom načelniku.
- (4) Komisija ima zadatak da u skladu sa odredbama ovog Pravilnika i na osnovu propisanih kriterija objavljenih u Javnom pozivu izvrši vrednovanje dostavljenih prijava, sačini pismeni izvještaj sa utvrđenim Prijedlogom raspodjele sredstava i isti dostavi Općinskom načelniku na saglasnost.

- (5) Komisija ima pravo da, u toku konkursne procedure i prije donošenja Odluke o dodjeli finansijskih sredstava od, od aplikanta traži dostavljanje dodatne dokumentacije radi utvrđivanja namjene korištenja finansijskih sredstava
- (6) Na osnovu prijedloga Komisije, Općinski načelnik će donijeti Odluku o dodjeli finansijskih sredstava namijenjenih razvoju i unaprjeđenju inovatorskog istraživanja (u daljem tekstu: Odluka), te će ista biti objavljena na web stranici i oglasnoj ploči Općine Centar Sarajevo.
- (7) Na osnovu Odluke, Općinski načelnik će sa odabranim Korisnicima zaključiti Ugovor o dodjeli finansijskih sredstava namijenjenih razvoju i unaprjeđenju inovatorskog istraživanja.
- (8) Odobrena sredstva, prema Ugovoru i ugovornim obavezama, će biti uplaćena na transakcijski račun korisnika.

Član 7. (Kontrola utroška sredstava i nadzor)

- (1) Korisnik kome budu dodijeljena finansijska sredstva dužan je nadležnoj općinskoj službi dostaviti izvještaj o namjenskom utrošku dodijeljenih sredstava u roku od šest (6) mjeseci od dana potpisivanja Ugovora.
- (2) Korisnik sredstava koji ne dostavi izvještaj sa relevantnom finansijskom dokumentacijom o namjenskom utrošku sredstava, obavezuje se izvršiti povrat nenamjenski utrošenih ili neiskorištenih sredstava Općini u roku od 7 (sedam) dana od dana zaprimanja pismenog zahtjeva Općine za povrat istih.
- (3) Ukoliko korisnik sredstava ne postupi po pismenom zahtjevu Općine, nadležna Služba će putem Pravobranilaštva Općine Centar pokrenuti postupak povrata dodijeljenih sredstava na račun Općine.
- (4) Ukoliko se utvrdi da podnosilac zahtjeva, po bilo kojoj osnovi, ima dugovanja i neizmirenih obaveza prema Općini Centar Sarajevo njegov zahtjev će biti odbijen.
- (5) Realizaciju i nadzor u procesu dodjele i implementacije podsticajnih sredstava u skladu sa odredbama ovog Pravilnika vršiće Općinski načelnik putem Službe za lokalno-ekonomski razvoj i mjesnu samoupravu.

IV- ZAVRŠNE ODREDBE

Član 9. (Stupanje na snagu)

Ovaj Pravilnik stupa na snagu danom objavljivanja na oglasnoj ploči Općine Centar Sarajevo .

Broj: 11/B – 11 – 401/23

OPŠTINSKI NAČELNIK

Sarajevo, _____ .godine

Srđan Mandić